

04 IULIE
RUGACIUNEA 4
SOBORULUI
SF.MUCENICI ROMANOVI
DE LA MOSCOVA

МОЛИТВА

О, Богославнии великомученицы царственнии, державнейшии заступницы Православныя Церкви: се ныне Церковь Христова прославляет подвиг страстоношения вашего, се ныне духовным светолитием вселенная просвещается свыше, и небо веселие в сердца любящих вас таинственно кропит: обаче аще и светлым облаком ходатайства вашего осеняема, земля наша беззаконьми содрогается и лютым растлением трепещет. Сего ради к вашему заступлению со слезами покаяния прибегаем, исповедующе, яко вельми согрешихом и Бога преблагаго преогорчихом грехи многими, отступихом от Небеснаго Царя, множицею щедрившаго народ наш, возвышавшаго рог благоверных князей и благочестивых царей наших, избавлявшаго нас от толиких бед и

упования нашего николиже посрамлявшаго. Обаче и к Тебе подобает нам припасти, о, сладчайший и многострадальнейший Царю русский Николае! Се бо зриши плач и стенание наше: умоли Бога да простит неверность нашу закону Его, и примет люди согрешившыя во объятия Своя. Ты бо еси отец и утешитель нам и по смерти, слава наша, и крепость, и надежда! Припадаем и Тебе, Царице и мати страждущим всем, великоименитая Александро: простри Твои руке к Богоматери, единой Радости скорбящих, и с Нею моли Царя царей о помиловании нашем. О, Царевичу Алексие! Кротчайший агнче царственный! Не смеем воззрети на лик Твой блудныма очима нашими, токмо простираем мысленне руке к Тебе, просяще небеснаго твоего заступления: сохрани всех нас от страшныя пагубы, мѣр сей объявшыя, остеняя прибегающих к Тебе от навет сопротивныя злобы и козней видимых и невидимых врагов наших. О, треблаженнии девомученицы рода царскаго! Озареньми небесными просветите сердца наша, да не ослепит нас век сей прелестный к погибели вечней. О, преславнии стратотерпцы царственнии! Даруйте всем любовью теплою к вам прибегающим смирение, целомудрие и любовь к Богу и человеку, обогащайте нас терпением и на Бога упованием крепким в скорбех и бедах; в страданиях же

умащайте сердца наша кроткою надеждою и тишиною вашего покровения, яко да ничтоже нас устрашит, ниже смутит, но да поведует и чадам нашим славу вашу, юже от Бога достойно восприяли есте. Испросите нам у Бога дух покаяния и сокрушения о гресех наших, просветите ослепшья сродники наша, от Веры праотеческия отступившья, соблюдайте нас и чада наша от суеты и злых обычаев мира сего, от растлителей душ и телес, от заблуждений и ересей, от болезней и нечаянныя смерти. Предстаните нам, недостойным, в час кончины нашея, и избавите нас от лютых приражений темных демонов, и приведите к Страшному Судию в светлей одежде добре покаявшихся грешников, в надежде о помиловании и вечном спасении, яко да ничтоже разлучит ны от Христа Бога и от вас во веки веков. Амин!